

Jedes Johr es neues Flooping Center

Sali Bebbi! Dr Floppi Center Friedhof faart do vor,
mir nämme jede Laade mit, wo isch in Lääbensgfoor.
Denn dr Shopping-Wahn z Basel isch nit z toppe,
es git immer neyi Maile zem go Shoppe.
Me nimmt e Hampfle Lääde und baut e Bunker drumm,
macht e riese Ereffnig und holt no d Heidi Klumm.
Dernoo schliesst me mit de Lääde e Knebelvertraag,
wenn nit spuursch, erlääbsch nim, dr näggschti Daag.
Die Laadeflechyy Pryyse sin gar kai Glaggs,
wenn das yygoosch, denn hesch e Gnaggs.
D Shoppingbsitzer allias Gäldhai GmbH,
sin die Ainzige wo do verdiene draa.
Im waarschte Sinn dien si yyber Lyyche goo
und dien si quaalvoll uusbluete loo.
Doch uns Dootegräaber duet s nit scheniere,
well denn kenne mir ändligg au profitiere.

Wenn mir Dachlugge Spinner yyber dr Cortege flitze,
dien mir als Dootegräaber, uff em Friedhof sitze.
Liebe Bebbi kumm ze uns und due di beaille,
denn mir wänn die stärbliche yberräschte verdaille.
Mir dien eych au dr Noochloos do verschängge,
nämmed numme und diend wie allewyyl nyt dängge.

D Politik feerderet die Center an jedem Egge,
egal eb die Lääde noochhär dien verregge.
Denn jede wo duet e heechere Boschte bsetze,
will sich schliesslich no e Dänggmool setze.
Wenn s den nit klappt und e Finanzloch duet klaffe,
sin doch mir Styrzaaler wieder d Affe.
E Politiker steert das gar nit fescht am Änd,
die hän näbem Lohn, schliesslich no e Conti-Korränt.

Worum duet zem Bispil s Styggicenter Floppe,
well fascht kaini Lyt me kemme dert go Shoppe.
Denn siebehundert Meter bi de Schwoobe nääbedraa,
kasch s glyych sehr viel gynschtiger haa.
Im Styggi hets viel Lääde vom obere Segmänt,
und das in Glaihynige, isch doch super intelligänt?
Denn wenn d Frau Merian e scheen Klaidli will go boschte,
derf s nadyrligg numme dr halbi Bryys no koschte.
Jede Laadebsitzer wo dert uffs groove Gäld duet hoffe,
isch äntwäder näb de Schueh oder scho grad scho bsoffe.

Wenn durch s Styggi laufsch, mainsch die sin nit ganz bache.
E glaini Uuswaal, kasch dr sälber e Raim denn mache:

Au d Migros hets dert scho brobiert,
und die halbi Flächi reduziert.
Denn nääbedra gits jetzt dr Denner,
fir Durchschnittsbyrger und fir Penner.
Dr Saturn an siiner Adrässe,
het dr Mediamarkt grad nomol gfrässe.
Und s Personal vom Sutter Begg,
stoot umme wie so Butter Segg.
Dää Aabligg isch wirgglig kai Pracht,
wenn däa nur nit au s Gipfeli macht.

Vom Kiosk här hersch e grunze,
die liebi Frau sott scho lang go brunze.
Und die Security joo s isch woor,
die kemme wie Verbrächer vor.
Bim Clairs kriegsch s Zyg fascht gschänggt,
wenn s däm nur no fir d Mieti länggt.

Das Suizidi verhalte vo dääne Lääde, kasch nit verstoo.
Wenn s ain nym git, kunnt s näggscht Opfer, s isch halt esoo.
Denn die Floppi Center Gäldhai, das isch grass,
hän e Wartelischte, länger als Dignitas.

Aber wie gsait am Änd sin mir Dootegräaber froo,
wenn e Laade stirbt, sin mir au sofort doo.

No e glaine Gratis-Tip au an d Baizebsitzer,
lueget dass eych nit bassiert dr glyychy Schnitzer.
Und sotte Dootegräaber in diner Baiz erschyne,
no gib ain uus, denn hesch kai Grund zem Gryyne.

E scheeni Fasnacht wynsche allewyyl d Dachlugge-Spinner.



p.s. „s goldige Röppli“: het dir unsere Waage gfalle, denn due nit nume umme lalle, schigg e SMS (Fr. 0.30/SMS) vom Morge- bis Ändstraich an d Nummere **9234** mit em Inhalt **Waage Nr,024**, doderbi kasch au du e Glodvreneli gwinne.